

阿差末菩薩經卷第七

西晋三藏竺法護譯

伐十

何謂覺意菩薩所行七覺意何謂爲七一曰意覺意二曰法覺意三曰精進覺意四曰喜覺意五曰信覺意六曰定覺意七曰護覺意一何謂意覺意所思念法而觀察經審於正典思惟經法稱揚專念自察其意不得法相能曉了此何謂諸法無有相者其相自然諸法悉空其能曉了如是覺念是謂意覺意何謂法覺意若能分別八萬四千諸經法藏選擇諸法應於藏義若不應藏歸於正義若無正義近義遠義淺義深義若第一義曉了法力合者散者決不決者悉能選擇知其本末是謂法覺意何謂精進覺意若以此意由是宣法攝取信定所護聖慧以微妙力樂於強識

無能制遠精進修行此平等行是精進覺意何謂喜覺意所愛樂法篤信不離常懷喜悅而不怯弱其身口心常得休息思務道法消化塵勞愛欲之患是謂喜覺意何謂信覺意若能所信永離身心愛欲塵勞心住定意是謂信覺意何謂定覺意由以意定達了諸法分別聖慧心以專精明識諸法諸根通利斷衆倒見所住無處皆由定故能致此耳解無吾我諸法平等是謂定覺意何謂護覺意若能思惟分別法界心不馳騁倚在俗法心無邊際不爲俗法之所迷惑不住假號無能動者無思無念無喜無惑由是之故得至聖路柔順法忍是謂護覺意此七覺意而不可盡何謂正見賢聖度世不住吾我不住人壽命無所倚見不住有見及與無見不住德本不

墮邪見六十二疑是謂正見何謂正念凡夫所念姪怒癡病塵勞之蔽菩薩學者不想念此唯念戒定慧解度知見事所示現品常念道義恒一其志謂心不邪是謂正念何謂正語所說言辭不自見身不見他人言語柔和

一不演麤義以此宣教入於聖道不說世談無益之言是謂正語何謂正治所修行者罪福衆義不行此法唯修正道平等之義是謂正治何謂正業演賢聖辭多所悅豫而知止足不捨限節不貪利養不懷諛謗心不遊逸所修輒善將養威儀見他得供不懷嫉妬已所得養安身而已不犯殃釁隨佛教訓是謂正業何謂正便若修方便從其正教不從姪怒愚癡愛欲而俱同塵也常遠此便樂於聖道至成滅度無爲之義常思念此是謂正便何

謂正意其意所住直心不受不懷諛謗而悉覩見生死之難一心思惟無爲之道不忘聖路是謂正意何謂正定以定意故乃謂平等由是之故諸法悉等其於彼定而立平等若有菩薩住此定者等度衆生不越正慧是謂

正定而不可盡去來今佛皆遊此路若有菩薩順從此教習學頒宣是則名曰八道而不可盡阿差末言唯舍利弗菩薩寂然所觀察者亦不可盡何謂寂然其心憺怕寂寞定然諸根不亂專精無想作性安隱不卒不暴庠序靜思捨不順念樂於一義除衆憒閑好喜閑靜其身寂寘心未曾亂思於閑居無有衆惡不匿其過不墮邪見而知止足志性清淨威儀備悉不越禮節知其隨時舉動應義供養順教合集德力而不自大不倚名稱功勳

遠聞其心專精樂於獨處一心禪思興於慈愍而行悲哀修於喜悅奉行觀護從第一禪至八不思議定意之門是謂寂然又其寂然業不可量若能通達於此業者是謂寂然何謂爲觀分別智慧奉修道法無我無人無壽無命觀五陰身四大法種觀諸衰入猶如空聚分別真成而觀察知十二因緣順無所亂捨離諸見覩諸報應因緣果實曉識德果所造證明入於正真已能入中省衆聖慧所謂觀者平等法品所見諸法而正諦觀不見異法空無相願唯覩於此三脫之門所謂觀者不見處所屋室之宅亦復不無不見起分不得顛倒妄想之業所謂觀者永無所見設無所見是謂爲觀於諸所見而無所見是謂爲觀如是見者名真諦見乃能曉了隨佛之教

如是見者爲菩薩故不墮無行不住正行是謂爲觀此則名曰菩薩寂然正觀而不可盡阿差末言唯舍利弗菩薩總持辯不可盡何謂總持積累德本思惟大業八萬四千諸品法藏執持誦念思之懷之不捨精進是謂總持又總持者皆能啓受諸法所說聲聞緣覺諸菩薩衆一切群黎文辭言說所講義理悉能識念是謂總持假使劫燒天地遇災其身壽終又彼菩薩雖遭此難續識總持懷在心中未曾忘亦不迷荒以聖慧眼普見諸法如自察掌是爲總持亦不可盡何謂辯才無有盡者所謂辯者所說無礙若講詎時無能制者辯才通利無能斷音辯無節限卒問尋對應機無難通達如水無一躡礙前世宿命所造清行報應所致乃得此辯諸佛所護諸

天宿衛所講說者終不唐舉辭無所侵趣無爲道如是辯才皆爲備悉恭恪謙下相人之器而爲宣法其有聞者各得其所不豫思惟有來問者吾當說此所詣衆會輒見人根衆生心念而爲說法本所從來生在人間志性真正一劫宣經而不休息所講經典無所罣礙是爲菩薩辯不可盡阿差末言又有菩薩講一切法皆歸無常物非我有其慧所說而不可盡一切皆苦諸法無我菩薩宣此亦不可盡何謂無常觀本末事悉歸無常無有科判其無常者不可令常從始以來無不無常是謂無常義何謂苦義雖有歡樂會當歸盡願不久存論說衆苦悉趣空無其空無者亦虛無實虛空苦義正等無異何謂非身於我不我永無本末彼亦爲虛寂靜無要有計其

空及空義者悉無有身何謂寂義於寂無寂乃謂爲寂所解說者而於憺怕亦無憺怕是謂爲寂所謂脫者修於靜默除一切想除諸想巴斯曰無爲泥洹之寂此謂寂義是爲菩薩行四諦之法而不可盡菩薩所行常修一

道不違他行何謂一乘道菩薩獨步而無有侶唯一已身得成無上正真之道爲最正覺被大德鎧自攝精進無極勢力其身獨立不從他教超諸俗力一已遊步被於堅固非常德鎧以此開化一切衆生是謂教化所訓誨者諸賢聖教菩薩大士所訓誨者是謂教化施非我伴我是施侶持戒忍辱精進一心智慧則非我伴吾是慧侶亦復不住六度無極吾順奉行諸度無極四恩之行不興發我吾當建立攝諸四恩取要言之諸善德本不能

立我吾當建立攝諸德本如是像法無有伴侶當自獨立而無二伴住金剛場以已身力降伏衆魔一發心頃得成無上正真之道爲最正覺是爲菩薩一乘之道而不可盡阿差未言唯舍利弗菩薩善權亦不可盡何謂善權諸佛世尊隨方便宜道法自遇有所開化以權方便親近道心其善權者因虛空生無有邊際志性隨時令致殊特其善權者皆能具足諸度無極所生之處因權行戒布施忍辱護身口心得至佛道不廢精進若無權者違失精進善權一心轉進聖慧不爾心亂善權智慧不捨生死周旋之難善權慈者多所養護除諸不仁善權哀者不厭生死開化一心善權喜者不樂一切諸所好慕善權護者修衆德本而不迴還善權天眼得佛十眼徹

觀十方而無邊際戊十善權天耳得佛十耳聞十方聲心所念形善權知心見衆生根悉曉本末善權方便念過世事見於三世去來今義善權神足在所至到而無限節多所開化十方黎庶善權方便知衆生性隨以方便而誘恤之善權修行曉衆人相本末終始善權所度過於此際令至彼岸善權入塵化衆愛欲令無諸垢善權下擔去諸五陰所負重殃善權行限而所頒宣不可稱載以諸有限說無邊際善權勸化諸弱劣根誘進退者使廣無極以權方便知其時節增減進退非時行時以權方便因其正路入於邪徑衆生之類住於邪路化入正道以權方便能使渺少變爲廣大其廣大者能使無限以權方便諸諍亂者伴侶相憎勸令和合以權方便其在下士

小乘之黨使住微妙以權方便得至滅度還入生死勉此餘人以權方便解諸繫縛閉塞羅網以權方便能使懷結心志忍辱以權方便常在寂靜不墮滅盡以權方便悉能解達一切所修威儀禮節不失儀式以權方便觀諸衆生而不毀戒常順正禁以權方便有所攝取而不諍訟以權方便興隆道法宣布十方以權方便獨步三界而無患難以權方便得至脫門致無所行以權方便棄不賢聖雖在其中不與同塵以權方便與道者俱入不違訓善權方便捨於無爲能入生死濟脫衆患以權方便入於魔界照諸塵勞愛欲之根以權方便計於一切無有一切亦不無有是則名曰菩薩所行善權方便入不可盡阿差末言是舍利弗菩薩所行八十品第而不可

盡諸佛世尊皆由此法八十無盡而出生矣阿差末菩薩說是法門不可盡品時七萬八千人從本以來未發道心應時皆發無上正真道意五萬二千菩薩尋時逮得無所從生法忍一切衆會咸取衆華若干種香諸寶華蓋以用供散如來至真及阿差末諸菩薩上奉敬歸此無極經要天於虛空鼓諸天樂舉聲稱歎佛者世尊從無數劫所積德本自致正覺廣度一切今阿差末菩薩大士稱舉經典宣揚本末不可盡誼若有人聞此不可盡經典要者心不懷疑信持諷誦爲他人說篤信佛言者亦當逮得如是功德不可盡誼佛取體衣賜阿差末一時嗟嘆阿差末菩薩言善哉善哉快說此經如來所勸代之悅豫十方江河沙今現在佛亦共嗟嘆時阿差末取

佛所賜著其頂上而嘆說言此世尊衣當以頂奉夙夜承事爲是天上世間擁護至尊無量佛之所服應時十方各有寶幢寶蓋寶幡各自然至覆阿差末菩薩之上寶衣寶蓋寶幡旛中自然演教而出音言善哉善哉阿差

伐十

八

末菩薩快說此辭能講頒宣無盡法門十方諸佛咸共嗟嘆時舍利弗前問佛言今此寶蓋寶幢從何所來乃演此音佛告舍利弗阿差末菩薩前所曾化衆生之類使發無上正真道意各於十方皆成正覺此如來等故遣此來供養報恩正士本德頒宣洪業大會之品供養經典故覆其上時諸衆會見此變化聞佛所說益復加敬阿差末菩薩大士歡喜踊躍我等善利宿本祿厚乃得值見阿差末菩薩稽首諮詢其聞此法福不可量假使有

人聞阿差末菩薩名者德無能限況復面值得歸聞經法其佛大聖嗟嘆勸之豈況凡庶佛告舍利弗若族姓子族姓女學菩薩乘諸佛世尊住世一劫咸共供養布施所有奉修禁戒而無所毀假使衆人加之痛害皆能忍

之元元精進行如救頭所火然熾禪思一心不懷憒亂觀察智慧不失時節奉敬諸佛如是終劫復有族姓子族姓女聞此經典篤信受持而諷誦讀專修奉行進退在心佛嘆此等六度無極皆爲備悉疾遠無上正真之道

伐十

九

爲最正覺所以者何若有菩薩學此經典心自發念我學斯經具爲人說頒宣悉周是則名曰能悉備具施度無極所以者何受此經者計於法施衆施之上近於佛道若具禁戒所度無極無所犯負衆行周悉無一缺漏是

故名曰戒度無極所以者何菩薩若宣此經
典時普備禁戒一切衆生不能稱載功德之
勲所不能逮假使菩薩忍一切法衆所娆害
而心不起不如誦學此經典要悉爲人說以
爲行智而得具足忍度無極其身口心常行
精進欲度一切未曾懈廢是則名曰進度無
極其有專精於此經典思惟不亂一心定意
是第一禪所度無極若於此經現在察慧據
取其義知行所趣是則名曰智度無極是舍
利弗若有精學此經典者因少行故具足菩
薩六度無極以是之故當作斯觀若有菩薩
取此經典誦在身懷若載竹帛上著經卷爲
以得攝一切諸法諸佛經典執在手掌可使
四大變之令異無能作威轉其道意所以者
何是經名曰諸菩薩印當求斯印假使有人

奉是印者則能遵奉一切佛法時四天王與
眷從俱皆執兵仗捨之一面又手白佛言我
四天王是佛弟子以得道迹能共堪任供養
此等諸族姓子及族姓女周市宿衛受是經
典持諷誦者奉之如佛所以者何一切諸乘
皆由此生於時天帝前白佛言數從如來諮
受經典其數百千未曾得聞如此經義暢達
進理無有遺疑我曾往昔與忉利天數數聞
伐十
經初未值斯若有郡國縣邑村落州城大邦
宣此經者當詣其所聽所咨講擁護法師益
其氣力精進堅強勇猛不怯辯才通利獨步
無畏斯族姓予以無所畏獨在衆中若在屏
處廣宣此經佛言善哉善哉拘翼若發勇意
欲護法師樂令氣力精勤無難佛言拘翼若
護法師則護經典以護經典則能將護一切

衆生時梵忍天王前白佛言吾當捨離梵天之禪樂思等心往詣法師所說經處擁護法師現四瑞應令覺知之其梵天王來至斯會從諸天人何謂爲四一者令見微妙光明二者得聞天香三者法師所說法利而無躓礙四者章句相次義不相越是謂四事說是經時心無所忘口語辯慧一切衆會悉欲來試無能亂者心懷念佛一心聽經以此四事所現慧意當知梵天與諸眷屬來詣彼會時魔波旬前白佛言因此經典令我羸劣無一勢力若有菩薩聞斯經典則爲受決所遊諸國視之如佛唯然世尊我身於今見阿差末威神聖力棄諸貢高不懷自大所以者何以此經典當興擁護宿衛法師從今自制不敢違教所在流布行此經典遙將養之不敢燒亂

爾時世尊告阿難曰汝當慇受於此經典持諷誦讀爲他人說當令正法永得久存阿難白佛言唯然世尊我以啓受諷誦已達但不能堪令普流布如諸菩薩佛告阿難汝但默安自當有人普令流布今此會中有諸菩薩主護正法當令奉宣布此大化于時彼會有六十億諸菩薩衆還從坐起應護正法前白佛言唯然大聖吾等俱共當受此經大會法品隨時流布遍於十方及此忍界皆當蒙恩彌勒菩薩護法王典當廣宣布斯經典要佛滅度後若有菩薩在於末俗五濁之世得聞此經持諷誦讀當知彌勒之所建立時佛讚諸菩薩曰善哉善哉諸正士衆汝等佛前而自咨嗟欲護正法則爲擁護十方江沙諸佛正法時阿差末菩薩前白佛言唯然大聖當

見原恕向者我身所講經典力少智薄所宣
句誼或能不備是故歸佛見捨罪罣及諸菩
薩奉無盡法佛告阿差末卿所說法句誼相
次無一違理逮無罣礙若有菩薩無陰蓋者
所宣道教無有缺漏分別經義審如所言況

今正士暢此經典表裏通達所度無極豈不
及乎今阿差末得四分別辯才智慧所暢目
在而於大乘無所依仰獨步無侶宣決衆疑
度于彼岸若有菩薩住此道地其身口心終
無缺漏於一切慧以爲元首無所不通身口
心行而皆備悉十方無數百千億佛皆共咨
嗟卿所講說今佛相恕表裏通達無一遺漏
十方諸佛亦復俱然於是阿難前白佛言此
經典者所號云何以何奉持佛告阿難此經
名曰阿差末菩薩之所講說義理章句而不

可盡其要名曰阿差末品阿難若有人受此
伏十 經法者其心轉明強識誼理功勲之正轉百
千倍爲他人說則立佛事佛說如是阿差末
菩薩賢者阿難諸天龍神莫不歡喜稽首而
退

阿差末菩薩經卷第七

音釋

頌道還切蹠陟利切礙恪克各切誘恤
九 頌布也 蹠不行也 碓謹也 誘恤以
也 律切引也 濟少息淺切諮津私切
也 諮訪問也 握舉蘊